

# Il pajais ch'il papa ha visità

L'identitad da la Turinga multifara

DA GUIU SOBIELA-CAANITZ

■ **La visita da papa Benedetg en Germania ha dà bier da lignar al public internaziunal. Las engiavineras religiussas laina surlaschar als teologs. Ma las etappas dal viadi «per discurre da Dieu» han era chaschunà in'intscherchezza geografica. Berlin e Friburg en Brisgovia, quai enconusch'ins; ma la Turinga, nua è quai?** Tgi che ha frequentà instrucziun da geografia avant 1990 ha strusch udì quel num: La «DDR» centralisada da lezza giada aveva abolì sias regiuns istoricas e laschava valair mo ses districts. Cun l'estrucziun istorica na stevi meglier: La 7avla ediziun (1989) dal mez d'estrucziun «Weltgeschichte» da Karl Schib e Joseph Boesch cuntegn ina charta da l'Europa enturn 525 (tom 1, p. 94) cun nums etnics, t. a. «Thüringer», ma quest num na stat betg en il text correspudent. Grazia al papa han ins pia discurrì, betg mo da Dieu, mabain era d'in pajais federativ tudestg ch'i vala la paina d'enconuscher: La Turinga.

## Fundament democratic

Ma adatg! Il num uffizial tuna: «Freistaat Thüringen». Quai n'è betg ina floscla. La Turinga è vairamain naschida 1920 sco stadi liber, cur che set republicas novas da la regiun han s'unidas ad in «Land Thüringen» aifer la Germania republicana. 1933 ha il nazissem abolì ils pajais tudestgs. 1945 ha l'armada sovietica restaurà e schlargià il stadi da Turinga, oramai suttamess a sia controlla. 1952 ha la «DDR», fundada 1949, abolì ils stadis da ses intschess e creà districts sco organs d'execuziun da las decisiuns centralas. La Turinga democratica d'oz è naschida 1990, suenter la crudada dal mir da Berlin. Ils 22 da fanadur ha il davos parlament da la «DDR», oramai democratic, vuschà la Lescha per la creaziun da pajais federativs. Trais circuls limitrofs han anc vuschà da far part da la Turinga. Questa (16 000 km<sup>2</sup>) è naschida sco pajais federativ cun la reunificaziun tudestga dals 3 d'october; ils 14 d'october ha il pievel da Turinga elegì ses emprim parlament. 1991 ha in referendum declerà Erfurt chapitala dal pajais ed approvà sia vopna cun il liun curunà d'aur dals landgrafs



Cartents cun lur bandieras dal vatican sin la piazza aviatica a Freiburg avant la messa cun il papa Benedetg XVI.

KEYSTONE

medievals. 1994 ha il pievel ratifitgà la constituziun dal pajais, numnà «stadi liber» tenor la tradiziun da 1920; el dumbra oz 2,2 milliuns olmas e sia chapitala 202 000.

## Plis landgrafs ed ina sontga

Gia en il 12avel e 13avel tschientaner hai dà in contadi da Turinga cun in center da cultura tudestga; sia tgina era il chastè da Schauenburg al pè dal Gaud da Turinga. Cont Ludovic da Schauenburg (†1123) duai avair fundà il chastè da la Wartburg sur il vitg d'Eisenach. 1131 ha la dieta imperiala confermà il titel da landgraf a ses figl sco Ludovic I da Turinga (†1140). «Ils conts da sia dinastia èn sa distinguids cun sustegnair la Baseligia (...) e sco trubadurs. Sin la Wartburg è sa splegada ina concorrenza legendara da trubadurs a l'entschatta dal 13avel tschientaner» (1). A la curt da landgraf Armon (†1217) ha Wolfram von Eschenbach scrit parts da ses «Parzival». Il 13avel tschientaner ha manà prosperitad a citads sco Eisenach ed Erfurt. Landgraf Ludovic IV (†1227) ha maridà 1221 princessa Lisabetta (1207–1231),

figlia dal retg da l'Ungaria. «Questa re-bellava cunter il luxus da la curt e manava malsaus sin il chastè (...). Ludovic la facheva curaschi (...). Entant ch'el reveva, sa deditgava Lisabetta adina dapli a l'ascesa religiosa (...). Il pli gugent sa musav'la en in simpel vestg da launa e s'occupava da malsaus. Durant in fomaz ha'la avert ils graners dal landgraf per ils paupers (...). Cur che quest è mort, avev'la 20 onns (...). Ses quinà Andri, il nov landgraf, l'ha privada da sia renta da vaiva. Sin quai ha'la bandunà la Wartburg cun ses trais uffants e chattà albiert en il clavà d'in ustier. Pir ses barba, uestg da Bamberg [en Franconia], ha pudì obtegnair la restituziun da ses bains (...). Lur ha'la fundà in ospital a Marburg [en Hessen] (...) nua ch'ella tgrava malsaus ed attempads cun agens mauns» (2). 1235 ha il papa declerà sontga Lisabetta da Turinga; en il dom d'Erfurt pon ins vesair in facsimile dal document da canonisaziun cun bindels en las colurs da l'Ungaria, nua ch'ins venerescha zunt «Szent Erzsébet». Andri (†1247) è stà il davos landgraf da la Turinga independenta.

## Duas confessiuns minoritaras

Durant il segiurn dal papa en Turinga n'han ins dudì, ni da sontga Lisabetta sco critica dal luxus, ni dal mistic dominican Eckhardt da Hochheim (en il circol da Gotha) che pregiava per tudestg ad Erfurt enturn 1300. La filosofia da «Meister Eckhardt» vegn savens messa en connex cun il budissem e correspunda strusch a quella dal Vatican actual. Per la paja ha papa Benedetg ludà Martin Luther (1483–1546) che è sa fermà ad Erfurt, sin la Wartburg ed a Schmalkalden. En la claustra dals augustins ad Erfurt ha'l vivì 1505–1511 sco muntg e student da teologia. 1521–1522 è'l sa zuppà sin la Wartburg, nua ch'el ha translà il Nov Testament en tudestg. 1537 a Schmalkalden, a sidvest dal Gaud da Turinga, ha'l preschentà ses Artitgels da Schmalkalden, fundament da la cretta evangelica. La reformaziun ha triumfà svelt en ina gronda part da Turinga. Il catolicissem è dentant sa mantegnì en las regiuns suttamessas al prinzi-archuestg da Magonza, numnadamain ad Erfurt, oz cun in agen uestg, e cunzunt en il cir-

cul d'Eichsfeld, strivla orasum la Turinga dal nordvest. «En l'Eichsfeld s'exprima la religiosadad savens anc oz profund cun il grond dumber da lieus da pelegirinadi, sontgets, chapluttas e cruschs sper via» (3). Ils 23 da settember 2011 ha papa Benedetg celebrà vespras en la chaplutta da pelegirinadi d'Etzelbach (vischnanca da Steinbach/Eichsfeld). Ma ils quaranta onns da «DDR» totalitara ed ateistica han mess fin als tschientaners da baselgias popularas. En Turinga èn mo pli 26% da la populaziun evangelica ed 8% catolica.

## 500 onns suenter la reformaziun

2008 èn las Baselgias evangelicas da Turinga e da l'anteriura provinza prussiana da Saxonia (Magdeburg e Wittenberg) s'unidas ad ina Baseligia evangelica en la Germania mesauna cun strusch 900 000 olmas, pia 19,5% da la populaziun dals pajais federativs da Turinga e Saxonia-Anhalt. Parsura spiritual da lezza Baseligia è ses uestg u sia uestga cun residenza a Magdeburg, uss Ilse Junkermann. En connex cun la visita dal papa ha la nova uestga declerà ch'il giubileum da la reformaziun 2017 a Wittenberg stimuleschia «da scuvrir ses stgais istorics ed actuals, betg mo la musica sacrala, mabain era l'entir sectur da la furmaziun u nossa architettura religiosa. Per ina Baseligia ordvart minoritara dat quai l'ocasiun da rinforzar nossa conscienza (...) e da scuvrir nossas pretensiuns socialas.» Areguard la musica sacrala dovran ils cumins-baseligia da Turinga dapi 1994 il cudesch da chorals da las Baselgias luteranas da Baviera e Turinga (4). 2008 è la nova Baseligia fusiunada sa definida sezza ad Eisenach en ina constituziun cun in preambel che sa referescha t. a. al Vegl ed al Nov Testament, als trais credos da la Baseligia ecumenica tempriva ed als texts fundamentals da la reformaziun. Il giubileum da 2017 pertutga pia era la Turinga, e co !

1. Rainer Eisenschmid (ed.), Thüringen. D-73751 Ostfildern (Baedeker) 2009, p. 31. Internet : www.baedeker.com.  
2. Rainer Eisenschmid (sco nota 1), pp. 62–63.  
3. Rainer Eisenschmid (sco nota 1), p. 136.  
4. Chasas edituras «Evangelischer Presseverband für Bayern» (Minca) e «Wartburg» (Weimar).